

# Paurongo

## Efeso Kpebung Yeneac Kibi

### Ohoec

---

**1** <sup>1</sup>Ni Paurongo Efeso taonnu kpetiac areng kecdae nga Yesu Kristo negensingedae, ngeneac kibi yomoc faiduae. Anutungo negennenu Yesu Kristoac aposoro anduae. <sup>2</sup>Mannina Anutu nga Kebunina Yesu Kristo yereac danggunuc nga ruaetoango ngenearu fefeseri febeso.

<sup>3</sup>Nenang Kebunina Yesu Kristo, yeac Anutu Manggac kenehebisina. Kristogoc kpeturanggema kecdimbeac amma yeng kurumenggac kenec Asuac arennu fedacde, imoc sasawa nemmeec. <sup>4</sup>Yennoc bicngoc yombong hanahema bangec kurumeng mi fingecmanu kiwau ebiha kpac nga kpetiac kecnideac Kristoac amma negengising anemmeec. <sup>5</sup>Nga medacfora annideac ye songoya nga negen negenga modacma Yesu Kristoac amma meisinnunuc <sup>6</sup>Amma ye Medackerengaac amma ubangerec yombong anemmeecac nenang eweheimima dengerebisina.

<sup>7</sup>Yesu Kristoac danggunucac dzohong imoc wakema fedecac nenang yearu kpeketaheni ye sawango kirecgenunuu mangana meic meicke fingerec. <sup>8</sup>Imocac dzohongau negen negentegec nga negen negeng fora mengeredacma kpetinggenemmeec. <sup>9</sup>Amma yeac ubau wosoefacac negen negeng sufu sufuya fede, imoc deserima yofi deireckenemmeec, <sup>10</sup>“Ni Kristo sueba bangecfu mama wiac sasawa bangecfu nga kurumennu fede, imoc kpeturanggema oruha anude. Nga negen negeng ua mema arenggema nasotoaya negenai, imohai fora fingerude.”

<sup>11</sup>Ye areng imoc bicngoc negensima yeac amma maridzominnina menideac negengising anemmeec. Ye wiac sasawa ubeau feec, imoc fora fingerudeac ifi arenggeec. <sup>12</sup>Imocac nenang hanahema erema Kristoac amma kekecseri menideac dedea, imoc negensinggedimbe. Nga Anutu kpara kengkena dengerema afehebisina. <sup>13</sup>Ngeni ifingoc yoac fora negemma memengerecac siduc gombang mema Yesu negensinggegec.

Negensinggema ngeneng yeac anggecdeac amma Tiri Asu ngenmeudeac deec, ye herenginau faima dzadzahacac dzic ngenmeec. <sup>14</sup>Kurumennu finacnina fede, imocac dzadzahacac dzic Tiri Asu ande. Imoc nenang nemmenemmea. Imoc mekecnideu Anutungo kuric bangecfunac nambaracfora mesinunuma menunuude. Imocac Anutuac kuc nga kibikperagia dengerebesonga.

<sup>15</sup>Anu ngeni Kebu Yesu negensinggeandae amma yeac kpetiac arengfora sasawa heresongogoc hoangyunuandae, yoacsiduc imoc negenaiaac <sup>16</sup>ngeneac amma nasosoc negensima Kebu numumima dangge dema <sup>17</sup>yofi numuanduae, Kebu Yesu Kristo yeac Anutu, kibikperagiaac Manggac, yeng negen negengtegec nga wiac sufufuya mekperac kperagi Asu ngenmeu Anutu hafoangoc negemmigecde. <sup>18</sup>Yeng ubaac kicngina mekperagiwiac kurumennu ngeneac tomiai fede, imoc negentegecbisia. Anutungo ngeni imoc mebesandaeac kpacngunuec. Wiac imoc kuc nga kibikperagiagoc wake wakea fede. Ye ngicngacfora kpetiac maridzomingngina imoc ngenmeudeac faiec fede. <sup>19</sup>Amma Yesu negensinggedimbe, nenannu yeac kuctoa engenango ua mekecde, imocac hania ifingoc negentegecbisia.

<sup>20</sup>Nga yengena kuha engena, imocngo Yesuaru ua meu homecfunac megborima meemma kurumennu faiec foiau tacde. <sup>21</sup>Nga kia gamang nga ngickuneng amma kuc hania hania nga sawakebangau kebuareng kecdae, yeneac engenatoa faiec tacde, imoc naso yofinenggacsac kpac, imoc ifi fekengkecbesande. <sup>22</sup>Ifi amma wiac sasawa haniaac turumannu kpedzucyunuma orucngina anudeac gununggema kpebungfora yenearu faiu yeng wiac sasawaac kunengngina kecde. <sup>23</sup>Anu yeni yeac forakebanga hanimaria anggec yeng imoc hafoangoc sing hania hania meficgedacma sasawa mewakedacande.

**2** <sup>1</sup>Ngeni warac Anutuac sing ferahema kopocsigoc amma ongaasungina homemea kecma <sup>2</sup>bangectoa bangecac kekec nga sawaac hadehade yeneac ngictau modacgec. Anu yaguc yoackpekpeac medacfora kecdae, yenearu ngictau imocngo ua mekecdengoc. <sup>3</sup>Ngeni nga neni ifingoc nenahafoc warac yeneac arennu kecma ubasebinina esea yeac songo nga negen negeng sasawa modaring. Modacni Anutuac sowecngo witininau enec.

<sup>4-5</sup>Nenang Anutuac sing ferahema kecni ongaasunina homemea anec. Anu ye sifu negennemmema wosoefaha engena anemmema heresongogoc hoannunudeac amma Kristogoc homecfunac nenahafoc megborinunuec. Anutungo wosoefaha ngenmema kopocsicac ebicfunac mesingunuu komoc kpegecde. <sup>6-7</sup>Ye Yesu Kristoac gombunggac amma wosoefac kpenemmema yegoc torokpenunuec. Imocac ngadeau danggunuctoayaac dzohong mekperagiudeac Yesu Kristogoc megborinunuma yegoc kurumennu fainunuec. <sup>8</sup>Imoc yofiac, ngeni Yesu negensinggegecac

yeng danggunuha ngenmema kopocsicac ebicfunac mesingunuu komoc kpegecde. Nga imoc ngenang gombungac kpac. Anutungo wosoefahaac amma wiac imoc ngenmeec. <sup>9</sup>Imoc ngenang angammemeac kpac. Imocac ngic mongngo yengenaac negenu wiac engena mi ambeso. <sup>10</sup>Nenang Anutuac marikibi nga Yesugoc kpeturanggema kecni Anutungo angammeme gombunga arenggema derecgenemmeec. Nga yeng areng imoc modacma kecnideac denemmeec.

<sup>11</sup>Imocac ngeni wiac yomoc negenggec febeso, ngeni warac bangecsebi arennu ngicngac bangec monnunac Anutu mi negemmima kecmagec yudangic yeni sebi tosangina herec herecgeango ngeneac yofi degec, “Ngeni imocngina kpac.” Faka imoc sebiu angana imoc ngicngo memea.

<sup>12</sup>Naso imohai ngeni Kristoa kpac kecma isaengic yeneac arennu torokpema mi kegec. Nga Anutungo dzadzahacac yoc dedzege isaengicngac kpeyemmeec, imocac ngadeau kegec. Ngeni bangectoa bangec yomohai Anutua kpac kegec nga kekec gombunga mong fingeibesande, imoc mi negensingegec. <sup>13</sup>Ngeni warac araing kegec amma naso yofinenggac Yesu Kristogoc kpeturanggema kecdae. Nga Kristoac sawango wangepngunuu Anutuac hoannu sikedacma kecdae.

<sup>14</sup>Kristo ye yengenaoc neneac ruaetoanina. Yudangic nga ngicngac bangec monnunac, nenang botucninau kpaefeu yeng imoc hendzicma ngaba imoc meickeu kpac anec. Kpac anu ye yengenaaru kpeturannunuu habu mocgu aning. <sup>15</sup>Nenanggarunac ngic gboria mocgu fingerudeac ye sacfusia faima dedeseriyoac manau nonoyoac fede, imoc sasawa meickeec. Ifi anu ruaetofinger. <sup>16</sup>Ye mariponnu homema namma habu yohockang ngabagoc tohoemema kefing, nenang kpeturannunuu uba mocgu aning. Amma Anutuaru fainunuma sacfusiango kpeturannunuu ruafinger. <sup>17</sup>Yeng sikema araing nga wegenac kekeha momoc ruaeyoac dekperagemmeu negening. <sup>18</sup>Asu mocgungo wangepnununuu ngeni nga neni kpeturanggema Manggacac hoannu naric hama nannide.

<sup>19</sup>Imocac naso yofinenggac kuriha monggoc mi kecdae. Ngeni Anutuac ngicngac kpetiacgoc kpeturanggema ama mingina anggec. Amma yofinenggac Anutuac arengfora kecdae. <sup>20</sup>Ngeni Anutuac ama mengunungunuya. Aposoro nga profete neneng serengunudimbe amma Yesu Kristo yengenaoc hocwotung seria ande. <sup>21</sup>Nenang sasawango yeac witiu torokpeu torokpe emma Asuac kucfu yadiseri amma Kebuac womongyada kpetiac fingeicyadi annide. <sup>22</sup>Asungo ngenearu ua mema ngeni ifingoc yearu meyadingunuma torokpengunuu ngeni Anutuac ama fingeicyadi anggecde.

**3** <sup>1</sup>Anu ni Pauro imocacnoc ngicngac bangec monnunac ngeneac amma Yesu Kristoac witicngic anai kecduae. <sup>2</sup>Ngeni neac hania bic negendae. Anutungo danggunuha ngenearu mekemma dema uayoac

denenec. <sup>3</sup>Denemma negen negeng sufufufuya didiu deficgenenec, yoac imocnoc wegena bic ohoduae. <sup>4</sup>Ngeni imoc osoma Kristoac yoac sufufufuya hania negentegecduae, ifi naric negenggecde. <sup>5</sup>Yoac sufufufuya imoc Asungo aposorofora nga profetefora kpetiac kecdae, yenearu deficgeyemmec. Bicngoc ngic keceregec, yenearu ifi mong mi dedea. <sup>6</sup>Yoac sufufufuya imoc yofi, nenang Yesu Kristogoc kpeturanggema kecdimbe amma Anutungo bicngoc nenanggac dedzege anec. Ngicngac bangec monnunac nga yudangic neni maridzoming imoc nenahafoc mekecnideac siduc gombung imocngo dekperaginemmeu forakebanga mocgu annide. <sup>7</sup>Ni siduc gombung imocac kingangkpekpe kecbadeac Anutungo wosoefahaac ua nga kuc amma danggunuha nenec, imoc yengena kucfu denenec.

<sup>8</sup>Anutungo ubangerec anenu Kristoaru semengtoa fefea fede, imocac siduha ngicngac bangec monnunac Anutu mi negemmidae, yenearu dekperagiyemebadeac ua imoc denenec. Ni ngic kpetiac sasawa yenearunac mameanec nga yeng sifu ifi anenec. <sup>9</sup>Nga yoac sufufufuya dekperagibadeac yoac yofi edenuma nenec, Anutungo wiac sasawa deu fingegec, ye negen negensufuya uba tembuha bicngoc hanahema negengerekefec. <sup>10-11</sup>Ye negen negentegectoaya imocac hania imoc bicngoc Yesu Kristo Kebunina yearu arenggeu yaguc fora ande. Gareng areng nga areng kuctoanginagoc sawau kecdae, yeni imoc negentegecgecdeac Anutuac kpebungforango imoc dekperagiyemebisia. <sup>12</sup>Anu Kristongo sing meficgenemmeu ye negensinggema kengec nga ubayohoa kpac Anutuac hoannu naric fingeckecdimbe. <sup>13</sup>Imocac yofi edengunuba negenggec: Ni ngeni meficngunubadeac kpendzeng witiaua kecba imocac ubangina kuha mi mabeso, kpac. Imoc memeficngina ambeso.

<sup>14-15</sup>Imocacnoc nenang Mannina kecde, ye fafoc heimima numumianduae. Yeng ngicngachabufora sasawa bangecfu nga kurumennu kecdimbe kpac nemmeu yeac kpac nenannu fede. Ngeneac negemma yearu yofi numuanduae,

<sup>16</sup>“Anutu, ge kuc nga kibikperagitoagango Asugaac dzohonnu kuc meficgeyemmeu ubaonganginango yadiseri ambeso. <sup>17</sup>Amma yeni Kristo negensinggec geng yeneac ubahereu kecbesena nga godongina heresongogoc kekecfu seria kecgecdeac meseriyununa. <sup>18</sup>Ifi anna yeni ngicngac sasawa kpetiac kecdae, yenigoc heresongogoc kekecac hania wihacnac made nga edihacnac hade amma noboc nobocnac hade nga emuhacnac erede, imoc efaima negentegecbisia. <sup>19</sup>Amma Kristongo heresongogoc hoannunuande, imoc ngic negen negeng sasawa ferahedacma fede, imoc ifingoc negenggecdeac numugenduae. Ammanu gearu ubaac semeng wake wake, imocngo mewakeyunubeso.”

<sup>20</sup>Anutu kuctoayango nenannu ua mekecde, yennoc ua hania hania engena yombong meudeac kuc femide. Amma yeac uango nunumunina nga negen negennina homac ferahedacde amma imoc wisic wisickea kpac. <sup>21</sup>Kristo Yesu kpebungfora kpeturanggema kecma kecerebesandae, ngeneac botucfu dedengerecngina yearu fekengkecbesande. Imoc fora.

**4** <sup>1</sup>Imocac ni Yesuac amma witicngicngo gorongina kpema yofi edengunuba, ye kecec siraha monnu kpacngunuec, imocac sirihau kecbisia. <sup>2</sup>Ngeni yumea amma wosonomang hafaogoc kecma faka yumea mekecma ubangerecfu modzotitia kpac tomai kecma heresongogoc hoangemema nanggeemebisia. <sup>3</sup>Amma Asuac ruaeac witicngo dedecngunuu uba mocgu anggec. Amma ngeni imoc herecgebauac seriyombonggema kecbisia. <sup>4</sup>Forakebanga imoc mocgu nga Asu ye mocgu, ifi isocngoc Anutungo kpacngunuu wiac gombunga siraha mocgu fingecongemmeudeac negensima kecdae. <sup>5</sup>Kebu ye mocgu nga negen negensing imoc mocgu amma dokunadzicngo mocgu. <sup>6</sup>Anutu mocgu, yeng Manggac urecnina mocgu amma engenatoanina. Amma yeng ngicngac sasawa botucninau nga ubahereninasoc kecde.

<sup>7</sup>Nga Kristongo yengena areng modacma kpebungfora nenang Tiri Asuac danggunuctoyaac semeng, imoc hendzicma ubangerehaac wiac tembuc tembuc denemmeecsoc, imoc mekecdimbe. <sup>8</sup>Imocacnoc yoac mong yofi fede,

“Ye wi sawau yombong emma witicareng witicyunuma  
wangepyununa arengau kenggec yeng bangecngic wosoefac wiara  
yemmeec.” *(Mitiyegec 68:18)*

<sup>9</sup>“Ye wi enec.” Imoc eng mi dedea, ye waraima mama bangec manau kemeecngo erema enec. <sup>10</sup>Ngic maec, yeng dzigenema emma kurumenga kurumenga ferecgedacma bangec nga kurumennu wiac sasawa sokodacma kefudeac enecnoc. <sup>11</sup>Amma yennoc ua yofi denemmeec, goa aposoro nga goa profete amma goa siduc gombung dedekperagi areng<sup>a</sup> nga goa kpebung yeneac gareng amma goa miti kpoukpou, ifi denemmeec. <sup>12</sup>Ngicngac kpetiac nenang miti ua kuhagoc mema Kristoac hanimari nga forakebanga meyadini seriudeac ifi fainunuec.

<sup>13-14</sup>Nenang nambarac kecec monggoc mi kecbisina, kpac. Anutu medahango uayoac denemmeec, imoc negensima hania negen negeng keme kemea mekecma yoara negensinggema uba mocgu amma kecbisina. Nenang sasawa ifi kecma mitiu yadiserima Kristoac kpeteusoc, imohainoc kensikemina Yesu yengenaoc mewakenunuude. Ikocngic yeneng firang isoc ikocyoacfu sing segema sebiu faifaiyoac hania hania kpounemmegec daracburuc kpema kengkpe hakpe mi ambisina. <sup>15</sup>Ifiac

<sup>a</sup> 4:11 Areng imoc yeni siduc gombung dekperagigec ngicngac ubangina heiu ubamereng anggec.

amma nenang heresongogoc hoangemema yoac fora dekecbisina. Ifi anni haifakaninango hafaogoc fingecyadi ammanu orucnina Kristo yearu kpeketahema fora menide. <sup>16</sup>Yea marabeau uanina tembut tembut meni, ginongngo hanimari nga wiac sasawa torokpedacma nanggeemeu forakebanga mocguyada fingecyadi annide. Imoc heresongogoc hoangemeemeac fakau fingerude.

<sup>17</sup>Ni Kebuac kicfu gorongina kpema edengunuba negenggec: Ngeni, bangec monnunac ngicngac Anutu mi negemmidae, yeni isoc monggoc mi kecbisia. Yeni negen negengngina kpekeng kpehaac amma sing obohoma kecdae. <sup>18</sup>Amma yeni negen negentegecngina mi fedec kundung manau dzingfong kpema ubasinginaac amma Anutuac kecec ngadeau kecdae. <sup>19</sup>Yeni faka gombunga ngadehema gamea kpac kaisero faka nga kecec sicsauhagoc modacma ubawonongnginagoc torokpeu torokpe kecandae.

<sup>20</sup>Nga ngeni Kristoac sing ifia mong mi negendae, kpac. <sup>21</sup>Kristoac yoac fora kpoungemmegec, ngeni imoc negenggec, imoc negenduae. <sup>22</sup>Hensongongina manganango ubanegen negengngina esea memanganec. Ngeni faka ifia warac modackecgec amma ngeni imoc wabisia. <sup>23</sup>Tiri Asungo ubanegen negengngina megboribes. <sup>24</sup>Amma Tiri Asungo ubanegen negengngina gboria meficgengemmeu ngeni imoc heigec kemebeso, imocnoc Anutu yengena onga isoc dindingac nga kpetiac yombong kecbisia.

<sup>25</sup>Amma nenang sebi mocguac oruc kickedzac nga hanimaria kecma meficemema kecdimbeac ngeni sasawa faka ikoha wadacma yoac fora tosofocngina yenigoc denegeng amma kecbisia. (*Dzekaraia 8:16*)

<sup>26</sup>“Ngeni herengina buu kopocsic mi meficgebisia.” (*Mitiyegec 4:4*)  
Nga ngeni herebu mekecmagec wenackiwango mi kemebeso. <sup>27</sup>Ngeni mangana mingina ama mi heimibisia. <sup>28</sup>Hamangecmeme ngic ye hamangec wama mariango ua fora mema semeng meficgema ngic makpekpea meficyunubeso.

<sup>29</sup>Ngeni isi enacnginaunac mong mi erebeso, kpac. Yoac deandae, imocngo ngicngac yoacngina negemma ebicnginasoc meficyunuma yadiseri anggecdeac meseriyunubesonga. <sup>30</sup>Ngeni Anutuac Tiri Asu ubaebic mi mibisia. Anutungo ebicfunac yungecngunuudeac naso faiec, imohai nanggecdeac dzadzahacac dzic Tiri Asu faingemmeec. <sup>31</sup>Botucnginau mundang kpema kecec mi febeso nga ngeni ngaba nga herebu faka wabisia. Amma ngeni yaipararac nga enacfu faifai mi ambisia. Ngeni mangana imoc sasawa wadacma ukudacbisia. <sup>32</sup>Ngeni ruae nga wosoefac amma ubamangang angemema kecbisia. Anutungo Kristoaru kopocsicngina waec, ifi isoc ngeni ifingoc ngenaocngoc kopocsicngina waemebisia.

**5** <sup>1</sup>Ngeni Anutuac songonambaracfora, imocac ngeni ye isoc amma yea kecec modacma kecbisia. <sup>2</sup>Kristo ye ifingoc heresongogoc

hoannunuma yengena sebua desiemema sese imoc Anutuaru mekemmanenangac donina mema homeec. Sese imocngo homung kerengagoc amma Anutuaru enec. Nga ngeni onga imoc modacma heresongogoc hoangemema kecbisia.

<sup>3</sup> Amma ngenang botucfu kaisero faka nga sicsauc kekec wonongagoc hania hania amma kichodung, ngeni faka imoc hafoangoc wama mi yombong debisia, kpac. Ngeni kpetiac kecdaeac faka ifia ngenearu angana mi ande. <sup>4</sup> Ngeni isi nga tenicfagoc yoc sicsauc kundungagoc, wiac ifia enacnginaunac ereu naric mi anude. Ngeni imoc wadacma ubangerecyoac nga dedengerecyoac degec ngereude. <sup>5</sup> Amma kaisero me ngic ubawonongnginagoc areng ifia yeni Kristo nga Anutuac eucerereng manau naric mi enggecde amma maridzoming imohai naric mi megecde. Nga kichodungac faka imoc nemu afec afehe faka. Nga ngicngac faka imoc meandae, yeneng eucerereng manau naric mi enggecde, ngeni imoc negenghomebisia.

<sup>6</sup> Ikocngic mongngo yoc sicsauha edengunuu ngeni imocac negenggec fora mi ambeso. Nocac Anutungo angammeme ifiaac kopocsicac turunga yoackpekpeac medacfora kpouyemmeude. <sup>7</sup> Imocac amma ngeni yenigoc mi kpeketahebisia. <sup>8</sup> Ngeni warac kundungac areng kecgec nga yaguc ine Kebuaru kpeketahema kperagia areng andae. <sup>9</sup> Amma kperagiaac faka fora yofi fingeckecde, angammeme gombunga nga dindingac kekec amma faka nga yoc fora dede. Imocac ngeni kperagiaac nambaracfora amma imocac sirihau kecma <sup>10</sup> Kebungo negenu wiac ngereude, imoc negengising amma ambisia. <sup>11</sup> Ngicngac areng goa yeni kundungac faka nga angammemengina fora kpac meandae, ngeni ine yenigoc mi kpeketahebisia, kpac. Nga ngeni faka nga angammeme nonongkac kperagiau mekperagigec haniangina hentegecgec ngereude. <sup>12</sup> Nocac yeneng fakangina sufufu angkecdae, imoc sasawa naric mi debade. Imoc deba gameagoc anude. <sup>13</sup> Nga faka ifia sasawa nonongkacfu faini kperagiango imoc mekperagi ireckeude.

<sup>14</sup> Imocac sirihau yofi, wiac sasawa kperagiango henu meaiude. Imocacnoc yofi dedea,

“O, ngic gau fema kecnecc, ge gborima homecfunac yacna. Ifi anna Kristongo mekperagiguude.”

<sup>15</sup> Imocac ngeni singngina gombunga hentegecma kengkecbisia. Amma ngeni negen negengngina kpac isoc mi kecbisia, kpac. Ngeni negen negentegecgec amma kecbisia. <sup>16</sup> Yofinengac faka manganango sokodacma fedec ngeni seserigoc faka gombunga amma kecbisia. <sup>17</sup> Ngeni ngicngac kapaya isoc mi kecbisia, kpac. Nga Kebungo ua dengemmeec, ngeni imoc hentegecma kecbisia. <sup>18</sup> Ngeni waingdoku seria nema ubasufu mi ambisia. Imocngo kekecngina memanganeude. Asungo ubanginau wakebeso. <sup>19</sup> Yegec mitikibiu fede nga Tiri Asungo yegec ngemmeude, ngeni imoc

heima ubaemenegeng ambisia. Amma ngeni yegec heima musi kpema Kebu ubaherengo dengerebisia. <sup>20</sup>nga ngeni Kebunina Yesu Kristo, yeac kpacfu nasosoc Anutu Manggac wiac sasawaac amma dangge edebisia.

<sup>21</sup>Ngeni Kristo eweheimima yeac amma uba mocgu amma enac tofoc tofoho angemema kecbisia.

<sup>22</sup>Nenggac Kebuac enac tofoc tofoho kecdae, ngeni ifi isoc ewefocngina yeneac enac tofoc tofoho kecbisia. <sup>23</sup>Imoc yofiac, Kristongo kpebunggac oruha nga ifi isocngoc eweango enemaac oruha ande. Kristongo kpebunggac oruha nga nenang yeac hanimari forakebanga andimbe nga ye Memengerecna. <sup>24</sup>Kpebungngo Kristoac enac tofoho kecde, ifi isoc nenggac ngeni ewefocngina yeneac yoac sasawa tofohobisia.

<sup>25</sup>Kristongo kpebungfora nenang heresongo negemma hoannunuma donina mema sebia desiemec, ifi isocngoc manggac ngeni enengfocngina heregoc yeneac songo negembisia. <sup>26</sup>Anu nenang kpetiac annideac ye yengena yoaraac kucfu mitidokuyango dzuacnunuec. <sup>27</sup>Dzuacnunuma menunuu kpebungfora nenang nekuc nekutuckea kpac nga goctoponina kpac kecma yeac kicfu fingeclide. Nenang gombunga nga kpetiac ebicnina kpac kecma kuc nga kibikperaginagoc yeac kicfu fingeclideac negenec. <sup>28</sup>Manggac ngeni sing imoc modacma enengfocngina heregoc yeneac songo negembisia. Ngenang sebinginaac angemmeande, ifi isoc enengfocnginaac angemmebeso. Ngic mong ye heregoc enemaac songo negende, yeng yengena songo negenude. <sup>29</sup>Nga ngic mongngo sebia ngaba naric mi ammiude, imoc kpac. Ye sebia henggareng amma neneyaka gombunga mima kecde. Kristongo kpebungfora nenannu ifinoc angkecde. <sup>30</sup>Nenang Kristoac hanimari nga kickedzac mocgu amma kecdimbe. <sup>31</sup>Yoaac mong yofi fede,

“Imocac ngic mong ye nonggomama wayuruma enemaaru

kpeketaheu yeri ubasebi mocgu amma kefecde.” (*Fingec fingec 2:24*)

<sup>32</sup>Anu negen negeng sufu sufuya yomoc kpeu keme kemea ande. Imoc Kristo nga kpebungfora ngeneac negemma deduae. <sup>33</sup>Imocac ngic sasawa ngeni tembus tembus ngenang heresongogoc hoangemeandae, ngeni ifi isoc enengfocngina heresongogoc hoangyunubisia. Nga ngac ngeneng ifingoc ewefocngina eweheihei ayemmebisia.

**6** <sup>1</sup>Nambarac, ngeni Kebuac amma nonggo mangfocngina yeneac enac tofoc tofoho kecbisia. Imocngo sing ddingac ande.

<sup>2</sup>“Ge nonggo manghocga seseheyurubesena.”

Dedeseriyoac imocngo wiac ngemmeudeac waracyoac ande, imoc torokpema yofi dedea,

<sup>3</sup>“Ge ifi amma wiac sasawa naric fingeclenu bangeclu naso herea kechereenade.”

(*Makekeng 20:12; Dedeseri 5:16*)

<sup>4</sup>Manggac, ngeni nambaracfocngina herebu mi meficgeyemmebisia, kpac. Ngeni Kebuac yoac modacma nonoyoac edeyunuma metingyunuma dederecge ayemmegec, yeni yadiseri ambisia.



<sup>5</sup>Wanacngic mingingina bageau kecdae, ngeni uanginau negengyohoa kpac, yumea kecma ngisima bangecfu mingingfocngina yeneac yoac tofohokecbisia. Dzonongngina fedeu yoacngina ferahebauac Kristoac enac tofohokecdae, ifi isoc yeneac yoac heregoc tofohobisia. <sup>6</sup>Nga ngeni mingingfocngina yeneac kicfu uanginaac gombungasiric mi ambisia. Ngeni Kristoac ua ngic kecdaeac Anutuac enac ubangerecngoc tofohoma songogoc uangina nasosoc gombunga mekecbisia. <sup>7</sup>Ngeni ngic yeneac negensima kpac, Kebuac negensima uangina imoc uba feacfu mekecbisia. <sup>8</sup>Nga negenggec, ngic mong ye yengena ua mekecde me wanacngic minginagoc kefu minginaac ua gombunga mekefudeu Kebungo imocac turunga socfungoc kpouyemerude.

<sup>9</sup>Ngic ngeni wanac ngic yeneac minging kecdae, ngeni ifingoc wanac ngicfocngina yumea ayemmema ngaba mi ayemmebisia. Ngeni yofi negembisia, kurumennu Kebu urecngina mocgu kecde. Yearu monde monde mi fede.

<sup>10</sup>Desima deba, ngeni Kebuaru heiserigec kuctoayango ngenearu ferecgema feu kucgoc kecbisia. <sup>11</sup>Mangana minginango ikocfu fusiunendzic ngaba sikengemmeu ngeni serima nanggecdeac Anutuarunac tebemariku dzikacac wiac sasawa, imoc megec kemeu serima nanggecde. <sup>12</sup>Imoc yofiac, nenang ngic sebifusi yenigoc dzikac mi kpekecdimbe, kpac. Nenang sawau enara areng nga wiac kuctoanginagoc hania hania kecdae, yenigoc dzikac kpema kecdimbe. Hade hade imoc yeni kundunggac kuc kuneng nga engena amma gareng kecma bangec noboc noboc uangina mekecdae. <sup>13</sup>Imocac Anutuarunac tebemarikungina nga dzikacac wiac sasawa, megec kemeu dzikacnasou seria nammagec ngaba yeneng naric mi memangunuma woragec ngeni seria nanggecde.

<sup>14</sup>Ngeni imocac yofi ambisia, yoac forango fadengngina anu ngeni imoc kebangnginau dzegebisia. Dindingac kekecngo mariku anu ngeni imocngo kperacembisia. <sup>15</sup>Ubangina meefaiu faka imocngo hanitabengina anu ngeni imoc heigec kemeu tiserima kemma siduc gombung dekperagigec ruae fingebeso. <sup>16</sup>Amma ngeni imoc sasawa mekecbisia nga tebeac saia, imoc negen negensingnginaac onga. Ngeni imoc nasosoc mema nanggec mangana minginango tebemedaha gereborangagocngo wedecngunuu ngeni imoc mebockegebisia. <sup>17</sup>Amma aieng opoc kpara “Anutuac memengerec.” imoc heigec kemebeso. Amma Tiri Asuarunac dzikacac beang kpara “Anutuac yoac.” ngeni imoc mekecbisia.

<sup>18</sup>Asungo ngenearu ua meu nasosoc Anutu kpacsambic ammima kecma nunumungina numumibisia. Ngeni gaugbori kecma seserigoc amma kpetiac areng sasawa yeneac negensima ifi angkecbisia. <sup>19</sup>Anu enacna efaiu kengecna kpac kecma siduc gombunggac negen negeng sufu sufuya dekperagiyemmebade nga Anutungo yoac nenudeac ngeni ifingoc

numubisia. <sup>20</sup>Ni imocac siducededengo witicamau tacma kengeha kpac yoac imoc gombunga edeyunubesare.

### **Dedesiyoac**

<sup>21</sup>Tikikongo hama kekecnaac hania nga ua meanduae, imoc obohobauac yoaciduc angemmedarude. Ngic imoc negen negensinggoc tosonina anu ye heresongogoc hoanggedimbe. Ye Kebutogoc kpeketahema seseri amma yeac kingang kpekecede. <sup>22</sup>Yeng neneac yoaciduc angemmema ubaefac kpengemmeudeac sueba haude.

<sup>23</sup>Anutu Manggac nga Kebunina Yesu Kristo yereng negen negensinggoc tosofocna ngeni ruaegoc nga heresongogoc hoangngunuma negen negensinggina meseribesera. <sup>24</sup>Ngicngac Kebunina Yesu Kristo heregoc yeac songo negendae, ngenearu danggunuc nga songotoaya wisic wisickea kpac imocngo fekengkecbeso.